



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Iran-i parnok indang nuclear sites mamaktsü metetdaksü

Man Utd-i Arsenal nungi asayar Heaven alizükogo

VOL. XXII ISSUE NO. 109 (ADOK 109) DIMAPUR AMUNGNÜ (SUNDAY) TSÜKLAI (FEBRUARY) 02, 2025 ₹ 5.00

Tzürangkong nung temelaba magii totzü aser ali rongsen nung teka maitüsü : JSS

Dimapur, February 1, 2025 (TYO): Mokokchung district kübok Tzürangkong Senso Senden (TSS)-i temelaba magii parnok lushi nungi totzü aser ali rongsen magidaktsütsü ta metetdaksüogo.

Assam den arrtsütepa aliba Tzürangkong tzükong nung Ao Naga nunger alir aser alemli nungi ali kiburtem lir ta TSS-i metetdaksüogo.

Union Ministry of Environment, Forest & Climate Change-i yaria Assam sorkari onok den masüngdangtepi ozü lushi nung Vedanta nem totzü bushitsü aser atsütetsü atema agütsütsü meranger ta onoki angazüker ta TSS-i sangdong ka nung ashi.

November 15, 2024 nü Assam nungi border magistrate, district forest officer aser Union Ministry of Environment, Forest & Climate Change ketdangsurtem den Vedanta nungi nisungtem meindoka liasü. Parnok ya onoki nem memetdaksüi aser temelaba magii totzü bushitsü aser atsütetsü atema aruba liasü ta JSS-isa ashi.

"Tsurangkong tzükong nung ali kiburtem Ao Naga nunger dang nem memetdaksüi, temelaba magii aser tenangzüktep kecha melii totzü bushia atsütetsü aser ali rongsen agiteta alitsü memelar" ta Tzürangkong Senso Senden (TSS)-i akangakanga metetdaksüogo.

Tanü nungi Road Over Bridge (ROB) lapoker

Dimapur, February 1, 2025 (TYO): Dimapur nung Hotel Tragopan anasa Road Over Bridge (ROB) February 2, 2025 anepdang 7:00 ako nungi lapoktsü.

Iba apu ya October 1, 2024 nungi shibanger yanglushia liasü aser maparen renemba sülen asüng nungi lapoktsü metetdaksüogo.

Iba dak sendakba nung Commissioner of Police Dimapur, Kevithuto Sophie, IPS-i traffic temetetsü ka agütsüogo.

Pai ashiba agi Deluxe point nungi Holy Cross point aser Khermahal nungi Deluxe point tashi maneni

"one-way traffic" asütsü.

Anepdang 9:00 ako nungi aonung 7:00 ako tashi New flyover (Tourist lodge towards Deluxe point) nung khu abenba garitem mesenzüdaktsütsü.

Külen, New Field Check inter-state check gate nungi Dimapur telungi aonung 7:00 ako nungi anepdang 9:00 ako tashi gari tulutem aidaktsütsü ta Commissioner of Police Dimapur-i metetdaksüogo.

October 1, 2024 nungi iba apu yanglutsü atema traffic lenmangtem aser tanga traffic tenokdangba agüja aliba agienger ta paisa metetdaksüogo.

BAN & Tourism department yaritepa Nagaland International conference ayonger

Dimapur, February 1, 2025 (TYO): North East nung terenlok aser rongsenketzüng aintsü atema Business Association of Nagas (BAN)-i Tourism department, Nagaland den yaritepa Nagaland International conference on tourism, transport and logistics ayongzüka amongtsü.

February 7 & 8, 2025 nung Niathu conference hall, Chumoukedima nung iba mungdang alitsü ta tayongertemi metetdaksüogo.

Nagaland nung tourism, logistics, aser transport infrastructure tajungba akümtsü atema lenmangtem bushiteptsü aser item wadang nung entrepreneurship & investment opportunities ajungkettsü atema iba sentong ayongzüka agitsü ta BAN-i ashi.

Anogo ananü mungdang nung North East India nung entrepreneurship aser investment opportunities nung temulung agütsütsü aser iba nung Nagaland nung tourism lenmang sadema aliba lemsateptsü. India aser Southeast Asia (SE Asia) nungi tongtipang nisungtem iba sentong nung adentsü ta BAN-isa ashi.

Nagaland tourism sector nung mapa inyaktsü aser renlokdaaktsütsü atema SE Asian tourism companies, international investors, aser eco-tourism inyakba temi shilem agitsü ajungmesotsü. Iba sentong ajanga North East India nung connectivity aser accessibility tajungba akümtsü atema transport aser logistics infrastructure mapa inyaktsü ajungmesotsü ta BAN-isa metetdaksüogo.

PM Modi-i Union Budget pusemer; INDIA bloc-i aitsür



New Delhi, February 1, 2025 (Agencies): Honibarnü Finance Minister Nirmala Sitharaman-i Parliament nung Union Budget sayaba sülen Prime Minister Narendra Modi-i iba kulikaket ya India renlokba maparen nung alizüng ka atongba lir ta ashi.

"India renlokba maparen nung tanü tongtipang alizüng ka tongogo. Iba Budget ya India nunger crore 140-i aginüba lir. Iba budget ajanga India nunger shia indang pungmang atalokdaaktsür. Onoki lanurtem atema wadang aika lapoktsüogo. Viksit Bharat mission ya sensotemi anir aotsü" ta PM Modi-i ashi.

"Iba budget ya tashi agütsür ka lir. Iba budget ajanga savings, investment, consumption aser growth tajungba akümtsü. Ni finance minister Nirmala Sitharaman aser lar telok nem Janta Janardan, People's budget atema tenüngsang agütsür" ta Modi-i metetdaksü.

Külen, Congress aser Trinamool Congress dena Opposition INDIA-ibo Union Budget 2025 aitsüogo.

Sorkari Union Budget 2025 ajanga linük nung tongtipang tebilemstütem medeni mejangjaba mapa kar inyaktsü ashir ta Congress MP tem- Karti Chidambaram aser Kumari Selja nati ashi.

Trinamool Congress lennir Abhishek Banerjee-ia Budget nung West Bengal atema kecha mali ta aitsüogo.

Union Budget ya injang agi yirua aliba nung band-aid enoktsüba ama lir. Centre dak shisatsü tajung kecha mali ta Congress lennir Rahul Gandhi-i ashi.

Narendra Modi'er sorkari budget sangdongba nung Bihar nembo tajangzük onsara agütsüogo saka NDA tongshi Andhra Pradesh nembo magütsü ta Congress-i ashi.

"Iba Budget nung linük nung timtemba onüktem maden saka

income tax agütsürtem asoshi dang anisüngzük agütsür. Iba budget ajanga rongsenketzüng nung kechi koma kongshidir memetet" ta Congress general secretary in-charge communications Jairam Ramesh-i ashi.

"Aluyimertemi MSP mangu" ta Congress MP Kumari Selja-i ashi.

"AAP national convenor Arvind Kejriwal-i GST aser income tax rates sadangtsü atema industrialists dang nungi Rs 16 lakh crore loan agienba meyipa agitsü shidangogo. Iba ajanga middle class aser common people kanga anisüngzüktsü saka iba tebilemba magizük" ta AAP MP Sanjay Singh-ia ashi.

Centre nung BJP-i aniba NDA kübok West Bengal maneni senzüka yutsür. Bihar nung taküm assembly elections agitsü aliba agi teyari aika agütsüogo ta Trinamool Congress national general secretary Abhishek Banerjee-ia ashi.

Bengal nungi BJP MP 12 lir saka parnoki state atema kecha meinyaker, ta Banerjee-isa ashi.

"BJP sorkar indang Budget ya tesüba nung Congress indang mesüka lir. Iba ya nübertem aser linük asoshi masü saka political taginüba atema tuluba lir" ta Bahujan Samaj Party tanishir Mayawati-ia ashi.

75 buba Jangpetkong Senso Mungdang Inti Senden agiogo



January 31, 2025 nü Advisor, Temjenmenba-i Molungyimsen nung 75 buba Jangpetkong Senso Mungdang nung o jembiba angur.

Dimapur, February 1, 2025 (TYO): Molungyimsen nung anogo ananü 75 Jangpetkong Senso Mungdang (JSM) Inti Senden takok ngua mongogo.

Iba senden ya January 31, 2025 nü tembang aser iba sentong nung Transport and Technical Education Advisor, Temjenmenba-i tetushi süa jaoker ka ama shilem agia liasü.

Naga putiotsü nung Molungyimsen ya kanga tongtipang lir kechiyong iba yimsüngi mezüng Khristan yimsü aru aser iba sülen asen nübor ajak dangi ayimsünga prokshi. Anungji asen oboula

nungeri yutsüba senmang ya asenoki maneni benshia aotsüla, ta Advisor Temjenmenba-i tesentepertem ayongzük.

Ibala sentong agidang asenoki tongtetsüba alizüngtem yudi aser asen loktiliba ajungtsü atema bangzüngdi ta paisa ashi.

Mokokchung district kübok Jangpetkong tzükong den külemi kidanger tzükong ana ya kanga tongtipang lir. Nagaland nung crude oil deposit 600 million metric tones shi lir ta researchers-i asadangteta lir aser iba ya tzükong asem nung teimtiba bendena lir, ta Temjenmenba-isa ashi.

Iba rongsen agiteta agitsü atema asenok külemi longiemer inyaktsüla aser village councils-i temzüngtem lateter terenlok mapatem inyaka aotsüla ta paisa ashi.

Global Naga Forum Convenor aser taoba Naga Hoho President Chuba Ozukum-ia pa tebilemba kar lemsatepdang asen loktiliba dak sendakba onük kar metetdaksü.

Iba sentong ya JSM mendenpurtemi ketdangsa agi, Molungyimsen Baptist Arogo pastor Rev. Tajung-i temoatsü meshia sarasadem aser Dibua Village Council züngsemtemi sobaliba ken ka aten.

NBSE-i chairperson Asano Sekhose den tepila sentong agi



Dimapur, February 1, 2025 (TYO): Nagaland Board of School Education (NBSE) chairperson mapa nungi sodi anguba atema la den tepila sentong ka ayongzüka agiogo.

January 31, 2025 nü NBSE Conference Hall, Kohima nung sentong agidang MLA & Advisor, School Education & SCERT, Dr. Kekhrielhoulie Yhome-i Chairperson Asano Sekhose nem tenüngsang agütsü.

"NBSE yangertetba aser kümetba nung lai aika meteta lir aser aika ajanghia aruogo. NBSE ajanga Nagaland state ya education system nung tajung ka kümdaktsüogo" ta Dr. Kekhrielhoulie Yhome-i ashi.

"Kaketshirtem tarutsü asoshi Asano-i educator aser administrator ka ama bendanga agüja inyakba atema pelar. Shisaliok tsütsü national aser international level nung tesentaktep aika yangluba

atema pelar. La melenzükertemi la indang senmang maneni ajungkettsü aser NBSE jenjang temabai tudaktsütsü imlar" ta Advisor Yhome-isa ashi.

"Asano-i NBSE nung chairperson ka ama mapa tajung inyaktetogo" ta Commissioner & Secretary, School Education & SCERT, Kevileno Angami-i ashi.

"Asano-i bendanga agüja inyakba ajanga Nagaland State ya education system nung tanga state tem den tajungba lir. Asano-i NBSE nung temelenshi aika bentsür aruogo aser la mapa nungi anisüngzüka sülen maneni takok nung liyonga aotsü moatsür" ta Kevileno-isa ashi.

Asano Sekhose-i o jembidang February 1, 1990 nungi tanü tashi NBSE nung inyaka aruba indang lemsatep.

Tsüngremi la nem taküm tajung moatsüba den public

service inyaka arudang len aniba atema tenüngsang agütsür ta laisa ashi.

Office ya asen ki tanabuba lir aser iba tangatetba nung lanuputu atema kanga meranga inyaktsüogo ta Asano-isa ashi.

Laisa la den külemi yaritepba ketdangsurtem aser staff dang pelaba metetdaktsü.

School Education-i teti nungita yariba aser Governing Board members-i kaketshirtem tarutsü asoshi inyakdang la nungita yariba atema pelaba metetdaktsü.

Lai Chairperson ka ama inyakdang registered schools-i la den amalitepa yaritepba atema pelar ta Asano-ia ashi.

"Chairperson menden nungi sodi angur Asano-i service career tajung ka yutsür aser iba ya tangar asoshi tatishitsü tajung ka asütsü. NBSE len aniba atema la dang kanga pelar" ta Secretary NBSE, Rangumbuing Nsarangbe-ia ashi.

Dmr aser Cmu nung Drugs License 24 agien

Dimapur, February 1, 2-25 (TYO): Department of Health & Family Welfare-i Dimapur aser Chumoukedima district tem nung Retail pharmacies 24 indang Drugs License agienogo.

Drugs and Cosmetic Rules 1945 nung Rule-65 kübok Licensed pharmacies lateta aliba ama aiben sangdongba aser mapang peria agüjaka parnoki mapa meinyakba ajanga Drugs Control Administration, DoH&FW-i iba lemtet agiogo.

"Drugs licenses agienba

sülen ibala ozüngi memelaba pharmacies nem mozü agütsübaji Drugs and Cosmetic Act 1940 and Rules alema inyakba mapa ka asütsü. Iba atema supplier/ wholesaler dak ozüng tapet mapa inyaktsü" ta H&FW department-i metetdaktsüogo.

Chumoukedima aser Dimapur District Commissioner of Police-i iba mapa nung yaritepba atema kanga pelar ta State Drugs Control Administration-i metetdaktsüogo.

Assam-Nagaland Student Exchange Program agi



Dimapur, February 1, 2025 (TYO): Govt. High School, Tzurangkong nung anogo asemnü Assam-Nagaland Student Exchange Program ka agiogo.

Iba sentong ya "Discovering Neighbours" omen nung ajemdaker among aser February 1, 2025 nü tembang.

Border Peace Coordination Committee (Assam-Nagaland)-i Friendship Forum (Tembayim Committee, TATT, Tzurangkong) aser Jorhat o Mokokchung District Administration den yaritepa iba sentong ayongzüka agiogo

Arrotsülen alirtem tsüngda tesentaktep akangshitsü aser timi liyonga aotsü tangatetba ajungkettsü nukjidong nung iba sentong ayonga agi.

"Nagaland aser Assam nunger tsüngda tesentaktep tajungba akümtsü atema iba sentong ya tongtipang mera ka lir" ta Mokokchung Deputy Commissioner Thsuvisie Phoji-i ashi.

"Arrotsülen lokti anema inyakertemi tensa raksatsüsa

mapa inyakba azüoktsüla. Asenok ya tsükchirtem masü saka adianutem dang lir. Iba sentong ya arrotsülen dang masü saka state tesem balala nung ayonga agitsüla kechiyong iba ajanga tesempatep aser mangatettep samatsütsü" ta Phoji-isa ashi.

Iba sentong nung Tzurangkong Students' Union President-i tesentepertem pelaa agizük, state anaprong nungi kaketshirtemi sobaliba shilemtem agi aser Border Peace Coordination Committee (A-N) Coordinator Er. Temsu Wathi-i anküp tepela o jemb.

Assam nung school ana nungi kaketshir 30 den Govt. High School, Tzurangkong nungi kaketshir 30-i exchange program nung aden.

Kaketshirtemji parnok tsürabur, guardians aser tesayurtemi meina liasü aser Assam nung aruba kaketshirtem Chungtiayimsen, Watiyim, aser Govt. High School, Tzurangkong tesayurtem kidang anenzükdaktsü.

AR-i Kezo Basa Village nung merükmejuba sentong agi

Dimapur, February 1, 2025 (TYO): Assam Rifles-i February 1, 2025 nü Kezo Basa Village, Kohima nung merükmejuba sentong ka ayongzüka agiogo.

Assam Rifles aser nübortem tsüngda tesentaktep akangshitsü aser linük ajungalen Clean India, Green India mission nungita iba sentong ayongzüka agiogo.

Iba mapang yimdaklir 35-i Assam Rifles den yaritepa public tesemtem merüktet aser hygiene o sustainable waste management indang osangtem prokshia liasü.

MLA Lima Onen-i Kongkhum Range Road zero point lapoktsü



Dimapur, February 1, 2025 (TYO): February 1, 2025 nü MLA, Lima Onen-i Mokokchung aser Tuensang na sendaktepba Kongkhum Range Road zero point lapoktsüogo.

Iba ya Warakok (Bhumji River) nung lir aser Alisopur village council-i parnok ali adena gari lenmang süidaktsüba

atema pelar ta Lima Onen-i ashi.

Iba lenmang ya nübortemi mapang talangka aginüa aruba lir aser Alisopur nungeria tanga district tem den sendaktepsü ta pai ashi.

Paisa sentepa alirtem dang yimtsüng, kin aser oshitem nung majemdaktsü saka telongjem

aser ka dang ta asüba tangatetba nung amanga noktaktsü ayongzü.

Iba sentong nung Yonyu village GB N. H Chingmak, Alisopur village Head GB Hongmong aser Executive Engineer (R&B), Tuensang Thungpang Chongshen nungeria o tatsütsü jembia liasü.

Manipur nung poppy alu raksatsü

Imphal, February 1, 2025 (Agencies): Assam Rifles-i Manipur Police den yaritepa Indo-Myanmar arrotsülen ali acre 30 shi ka nung poppy alu raksatsüogo.

Honibarnü Tengnoupal district nung Khudei Khullen yimtsüng nung iba mapa inyak.

Tanep 8:30 ako nungi Assam Rifles aser Manipur Police personnel 100 shi kati mapa tenzüka inyak.

Inspector General of Assam Rifles (South) lenisüba kübok iba mapa inyak. Mapang talangka poppy lu ayimba ajanga lendong bentsür aruba indang awareness campaigns aika agia aruba sülen iba mapa inyakogo.

Tanü ketdangsurtemi ghonda 8 shi ka agia poppy alutem raksatsü. Iba dak sendakba nung nisung shinga mapu saka FIR ka benokogo.

Union Budget nung Bihar nem schemes aika lezmüksüogo



New Delhi, February 01, 2025: Honibarnü Union Budget 2025-26 benoktsü jakdang Finance Ministry office kima Union Finance Minister, Nirmala Sitharaman den Union Minister of State for Finance Pankaj Chaudhary aser Finance Ministry nung tongti ketdangsertem tangokba noksa nung angur.

New Delhi, Tsüklai/February 01 (Agencies): Honibarnü Union Finance Minister, Nirmala Sitharaman-i Parliament nung Union Budget 2025-2026 benokogo; iba budget nung taküm assembly election agitsü aliba Bihar nung Makahana board ka tentetsü, greenfield airport ka amenoktsütsü aser Western Koshi Canal Project atema senotsü aika lezmüksüogo.

Union Budget 2025-26 nungsa Finance Minister Nirmala Sitharaman-i Bihar nung National Institute of Food Technology, Entrepreneurship & Management amenoktsütsü aser IIT Patna nung hostel ulushitsü aser tanga infrastructures atema senotsü lezmüksütsü.

Bihar nungsa Patna airport ulushitsütsü aser Bihta nung brownfield airport ka amenoktsütsü, ta Minister-i sangdong.

Yaküm July ita budget nunga Centre sorkari Bihar nung project balala atema sen crore 60,000 dak tali lezmükja liasü. Item project rongnung expressways project asem, power plant ka, heritage corridors, airports tasen aser sports infrastructure densema liasü.

Taküm küm tatembanglen Bihar nung assembly election agitsü.

Bihar nung Makhana Board ka tentetsü sangdongba mapang nung Sitharaman-i, "Bihar nung nüburttem atema maongka tajung ka lir. Makhana jenti adokdaksütsü, meraksatsüsa wazüka ayutsü, jenjang tajungba akümtsü aser ayoktsü atema state nung makhana board ka

tentetsü," ta metetdaksü.

"Bihar nung onoki National Institute of Food Technology, Entrepreneurship and Management ka tentetsü," ta lai metetdaksü.

Poorvodaya scheme kübok sorkari Bihar, Jharkhand, West Bengal, Odisha aser Andhra Pradesh ama anüdoklen region nung aliba state tem nung lenla ajaklen terenlok alitsü atema inyaker. Bihar nung iba ama Institute ka amenokba ajanga region nung chiyungtsü wazüka ayuba tsütsü yaritsü, aser ibaji ajanga aluyimertem income timba akümba den külemi lanurtemi mapa maongka aika angutsü.

Sitharaman-isa, Bihar nung greenfield airports amenoktsütsü, Patna airport ulushitsütsü aser Bihta nung brownfield airport ka amenoktsütsü, ta metetdaksü.

Finance Minister-isa, "Western Koshi Canal ERM Project atema senotsü teyari agütsütsü, aser ibaji ajanga Bihar kübok Mithilanchal region nung aluyimba li hectare 50,000 nung aluyimertemi tajangzük angutsü," ta metetdaksü.

"IIT Patna atema senotsü teyari agütsütsü, hostel ulushitsütsü aser infrastructure capacity ka amenoktsütsü. Taruba küm pongu tsünga IITs aser IISc nung technology research atema fellowships 10,000 agütsütsü. Iba dak alia sorkari 2014 küm amenokba IITs 5 nung infrastructure terenlok mapa inyaksütsü, aser ibaji ajanga kaketsüshir 6,500 talii shisaliok angutsü," ta lai metetdaksü.

Bihar nung tourism ajungkettsütsü aser iba dak

sendakba nung lai, "Sorkari Bihar nung Lord Buddha taküm dak sendakba tesemtem nung terenlok mapa inyaksütsü. Bihar nung Lord Buddha dak sendakba tongtibang tesem aika lir; item rongnung Bodh Gaya, Nalanda aser tanga nüingshi tesemtem lir," ta metetdaksü.

Bihar nung Bharatiya Bhasha Pushtak scheme tenzüksü aser iba mapatong kübok scools aser higher education atema digital format nung India nung oshitem nung adokba kaketter agütsütsü, ta lai metetdaksü.

"State pezü den külemi Bihar nunga National Centres Of Excellence amenoktsütsü. Iba dak alia linük tesem ajaklen sorkar school tem nung Atal Tinkering Labs 50,000 amenoktsütsü, aser iba mapatong kübok tajangzük tuluba anguba state ji Bihar asütsü," ta lai ashi.

Union Budget benokba sülen Bihar Chief Minister, Nitish Kumar-i, "Iba ya ajanga state nung terenlok kanga kera akatsü. Ni Ato kilonser Narendra Modi aser Finance Minister Nirmala Sitharaman na dang pelar," ta metetdaksü.

Union Minister for Food Processing Industry aser Lok Janshakti Party (Ram Vilas) tongti lenir, Chirag Paswan-ia, "Bihar nung National Institute of Food Technology, Entrepreneurship & Management amenokba ajanga anüdoklen region tesem ajaklen chiyungtsü wazüka ayuba jenjang tajungba akümtsü aser aluyimertemi züsentetba chiyungtsü quality tajungba akümba ajanga aluyimertem income tali akümtsü," ta metetdaksü.

Delhi assembly elections jakdang AAP MLA 8-i BJP nung aden

New Delhi, Tsüklai/February 01 (Agencies): February 5, 2025 nü Delhi nung assembly election agitsü lia Honibarnü Aam Aadmi Party (AAP) MLA 8-i party toktsür Bharatiya Janata Party nung denogo.

Taruba assembly election nung tokteptsü atema party ticket magütsüba agi parnoki tejashi nung party toktsür BJP nung aden.

Parnoki, AAP party ya centralise kümogo, teladak masü aser party telung nung democracy mali, ta aitsü.

AAP toktsür BJP nung adener MLA temji Naresh Yadav (Mehrauli MLA), Rohit Kumar (Trilokpuri), Madan Lal (Kasturba Nagar), Rajesh Rishi (Janakpuri), Bhavna Gaud (Palam), Bhupinder Singh Joon (Bijwasan), Pawan Kumar Sharma (Adarsh Nagar) aser Girish Soni (Madipur) nung lir.

Madan Lal aser Bhavna Gaud nati, joko parnoki AAP aser party tongti lenir Arvind Kejriwal dak tamang mekateter, ta ashi.

Dalit nung nütsünga aika aliba Trilokpuri constituency nungi MLA Rohit Kumar-i, AAP-i votes atema Dalit/Valmiki nung anema inyaker aser nangzükba ama meinyaker, ta aitsü.

Naresh Yadav-i, party telung nung lenirtem ola nembangtsür, ta ashi aser Rajesh Rishi-i, party-i teladak süa meinyaker, ta aitsü.

Pawan Kumar Sharma-i, "Ochi tangatetba nung ajemdaker iba party ya tenteta liasü, saka tangbo party-i iba tangatetba nungjagi pilaogo. Tang AAP inyakyim ajanga ni jashir," ta ashi.

Bhupinder Singh Joon-isa, AAP-i tangatetba tajung nungi pilaogo; mapang ka nungbo iba party ya nüburt tiyongtsü südaksüba party ka liasü saka tangbo tashi alia amshir, ta aitsü.

Delhi nung election agitsü lia AAP aser BJP na tsünga aitsütepa nübo yimtepba mapang ka nung AAP MLA 8-i party toktsür BJP nung adener.

Aam Aadmi Party-i mezünga 2013 küm Delhi assembly election nung toktepa menden 28 nung takok anguba sülen Congress-i yaria AAP-i sorkar aküm.

2015 küm election nung AAP-i menden 67 tashi nung takok ngua liasü aser 2020 Delhi Legislative Assembly election nunga AAP-i menden 62 tashi nung takok ngua sorkar aküm.

February 5 nü Delhi nung Assembly elections agiba sülen February 8 nü vote azüngtsü.



New Delhi, February 01, 2025: Honibarnü Rashtrapati Bhavan kima Amrit Udyan lapokba mapang Tir, Droupadi Murmu-i nung kongshidangba noksa nung angur. February 2 nungi tenzuka March 30 tashi public atema Amrit Udyan lapoktsütsü.

Chhattisgarh kübok Bijapur district nung Maoists 8 khaset

Raipur, February 01 (Agencies): Honibarnü Chhattisgarh kübok Bijapur district nung sepaitemi Maoists telungpur 8 khasetogo, ta police ketdangser kati metetdaksü.

Khatepba tesem nungjagi Insas rifle ka aser barrel grenade launcher (BGL) ka densema raraba hadir kar angu, ta paisa metetdaksü.

District Reserve Guard, Special Task Force, Central Reserve Police Force (CRPF) aser CoBRA (Commando Battalion for Resolute Action) sepaitem senteper Maoists telungpurtem mita aoba mapang Honibarnep 8:30 ako meta Gangaloor police station area kübok arem nung parnok tsünga khatep tenzuka liasü, ta Inspector General of Police (Bastar Range) Sundarraj P-i metetdaksü.

Communist Party of India

(Maoists) indang "West Bastar division" nungi züngsemtem iba tesem nungji aliba osang lazükba sülen Hokolbarnü sepaitemi parnok anema operation tenzuka liasü, ta paisa metetdaksü.

"Raraba tesem nungjagi telungpur tasümgang 8 angu. Iba dak tali khaseter alitsüa akok. Iba tesem nungji tang tashi telungpurtem mita odar. Onoki Insas prangpong ka, barrel grenade launcher ka aser tanga hadir kar nguogo," ta Sundarraj-i metetdaksü.

Taküm küm tenzükter tang tashi nung Chhattisgarh nung Maoists telungpur 50 tepsetogo. January 20-21 anogotem nunga Chhattisgarh state kübok Gariaband district nung sepaitemi Maoists telungpur 16 khaseta liasü.

Yaküm state nung tatalokba balala nung sepaitemi Maoists 219 tepseta liasü.



February 01, 2025 nü Patna nung aliba TV showroom ka nung nisung kari Finance Minister Nirmala Sitharaman-i Parliament nung Union Budget benokba reprangdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 02, 2025

Tsüngrem medeni takok anguba

Alima nung nisungtemi anguba takok ajak ya Tsüngrem nungibo masü. Aji oda, Sayutsünger tapu 8 tekong 14 nung yamai ashir, "oda temeshipur nisung dak tamajung inyaker dak ama ataloker aser ano nisung tamajunger dak temeshi pur dak ataloker ama ataloker." Tetezü alima nung asenoki temeshipurtema ta bilemba purtem kanga timtema angur saka nisung tamajung shirnoki nisung tepseter, auyar aser rakzükratemer parnokjiang temeshi pur nem moatsür ama jangratema azükarua aliba angur. Aji oda, asenoki aseni inyakba aser aginüba mapatem nung Tsüngrem dang nungi takok aser tajangzükjiang tuluba küm daksüra, atangji takok angutsü aser tajangzuka alitsü. Ajisüaka, item takok aser tajangzüktemji Tsüngrem maden anguba takoktem asütsü. Nisung asoshi shitak mesükba lenmang ka lir saka tatembangji tasüba ta asüba temoatsü aser takoktemji itemji asütsüa akok. Iba jagi kasa Sayutsünger tapu nung ashir, "oda Tsüngrem tsübuba pur shiri Pa dang tsübur, parnok jungküm saka tamajunger asoshi asaktsü." Ibaji alima nung Tsüngrem tsüburtem asoshi anisüngzük o aser Tsüngrem metsüburtem atema tekümdangtsü o asütsü. Atangji, tanü asen lima nung nisung aika tiyazü jembia pei mapa nung takok angur, rakzükratema takar akümer aser tashiyim agi yimten mapa nung takok angur. Item takok ajakji asenoki Tsüngremi moatsüba takoka ta bilemer, anungji tamajung mapa inyaker takok anguba takoktem ajak asoshi asenoki Tsüngrem nem tenüngsang agütsür. Nisung kar tepseter mesüra yirutsür takok anguba, nisung kar temulung jashidaktsür takar akümba, ochimashi mapa kar ajanga takok angubatema asoshi Tsüngrem nem tenüngsang agüja sarasadembaji Pai agizüksü asü? Tsüngrem medeni takok anguba nung lendong lir ta meteterem alima tanishirtem rongnung Mosa-a ka liasü. Anungji, Tsüngremi kodang Pa dang Egypt lima nungi Israel nungertem aniteta anir aotsü nungloksü, Mosai Tsüngrem dang ashi, " item nübortem anir oang ta nai kü dang ashir, ajisüaka kü den shiba yoktsü ajibo nai kü dang mashir.... nü tatenba onok den marura, onok yang nungi anir touma." Anitet 33:12 & 15." Kibubai langzü, "Kü tatenba nü den aotsü," Anitet 33:14. Asen den Tsüngrem lir ta züngzunga meteter inyakba aser takok angubaji jangratemtsüka lir. Tanü asenok anema alitsüa akok mesüra mapa ajak nung takok aser tajangzuka ngua alitsü akok, ajisüaka item takok aser tajangzüktemji Tsüngrem adenba agi anguba masütsüa akok. Aji oda, asenok dangi aruba temoatsütemji kong nungi aruar, itemji jangjatsübaji kanga tongtibang lir. Ashiko, nai Tsüngrem masü saka rongsen arishiba agi tajangzük anguba asütsüa akok mesüra Tsüngremi mulungba masü saka nai mulungbalen alima konang bushiba agi takok angu asütsüa akok. Ajisüaka, Mosai ashiba ama, asen jakdang aser asen meketa aliba tsükchirtem madak takok nguyonga oaka mesüra mamatzü aser ninang mojitzü talubosa alidak Kanan lima tashiji tonga oaka, Tsüngrem tatenba medenra amajok ta asenoki metettsübaji kanga tongtibang lir. Tsüngrem medeni anguba takokji takok masü, ibaji asen tenük agi ngua alima tsüngdang samatsüba mapatem lir. Tanü asenoki nisung tamajungertem aika rongsen aser alima yimten tashi madak jangratema aliba angutsü, ajisüaka Tsüngrem medeni anguba rongsen aser tajangzüktem jagi asenok dangi memenui teraksa aser tebilemstü khuret tulu bener arutsü. Atangji, takok aser temoatsü ajakji Kibuba nungi arur, anungji asenoki Pa dang meshir. Aji oda, tanü asen akaba rongsen, takok aser maongka ajak ya shitakba Tsüngremi agütsüba temoatsü asü masü ta reprangdangtsübaji kanga tongtibang asütsü. Asen kidang Tsüngremi memulungba rongsen ayuba agi aser Tsüngremi memulungba tashi amshiba agi tarutsü senmangertem kangshidaktsütsü agibo, tanü Tsüngremi mulungba inyakba temoatsü agi tarutsü senmangertem anisüngzuka lidaktsü tajungba asütsü.

OLEMSABANG

Na-a liang Tangar-a lidakjang

P. Renthly Jamir

(Yashi adok nungi...)

Yim shia atsü atsür settu tur aso angena lir arür tsübu agi lenmang tapi agi pia mayu. Aor tashi temeteter nisung 16-i züluba History of Mokokchung nungbo yamai zülua lir "One can easily imagine how the first white man must have suffered carrying his bundle of clothes on his back as he travelled from place to place depending on the rough hospitality of the ancient jungle dwellers." History of Mokokchung - page-83. Mezüngbuba temesüng nisung pa rongdong nung sübhong alenloka bener tesem ka nungi kati timtema senzüba indangang zülua angur.

Ano parnoki ya asüngdang, kibur majep nung na kechi atema yamai asangshia ajeper? Iba ajeb-ba yabo tanga agi ajeber masü, saka Kibuba Yisu imlibilema ozü nübör tezülur ajak tali majung amokmerenba telok tenüngbo literature board ta saka Aor zülumen den meputep parnoki züluba onoki rateta majiteter joko yamala boardbo ozü lima nung tadokdaksü ta nübör bilema ajeberba dang lir. P.Renthly Jamir ama kari nüktzü yimtoka mejebra ya nübör agi atila masü.

Ano ka nung Ao mungdang alirtem ya YAR suwar lenimaortem sentepa aliba ABAM masüa ta metetang parnoka Impurji müketa SENTRY yoa alitsüa akok ako. Iba oren nung YAR ta aliba tetezü yabo ni memetet. Kechiyong ya tsüngsanga yarba oren masü. Saka SENTRY tetezübo Tanüker Sepoy dang ajar, Soldier Stationed to keep guard. Akidang Rev.Kijung mapang onok Impur nung azüngdangbo ABAM pur anüktsü Sepoy lia mangu. Ano ni ABAM Education & Literature Board nung inyakdang Executive Secretary Rev.Kari Longchar aser Rev.O.Alem mapang nunga parnok anüktsü Sepoy ayuba ni mereprangshi. Süra item tanükerji kodang shiba mapang nungi ayur P.Renthly Jamiria metetnür. Tang arogo nung tershilembo tezüsür An tenla nungi tenzüker kibongtem dangi envelope kwi aiter, aser Naga Nüchiso bushiba wadang nung taküm tenlar A.Z.Phizo aser Imkongneren nungera Indian army tsüngdang pei küm dang küm danga aliba dak alema sentry yua maru aser ayuba Naga nung ertsü nung mangu. Süra dang ABAM nung inyakerteri Impur müketa sentry yua alitsü ta asüba yabo alima nung ertsü sütsü mapa aser alima nübör dang aakseta bilemer.

Ni iba ocet züluba ya parnoki asüngdangba dang kar agiteta item kakat den medemdanga langzür:

1. The Ao Nagas (J.P.Mills)
2. Ao Lipok Otsü (P.F. Adams)
3. A.Corner In India
4. History of Mokokchung
5. Merangkong Arogo Otsü
6. ABAM Küm Tatem Tezülubatem (1897-1971)

Ni küm tenem tema osang kakatem nung nübörtem den shisa lemsatapa zülur. Idangji timtem aser temotongshitepba aika ajangshia aruogo aser osang zülur ka atema aji tim ta bilemer. Aser ni ANAREP IMPUR ocet züluba nung shinga anema aser aija mezülü, aji tazüngertemi ngua züngogo, saka iba tasüngdangba paika ya kechi ta bilemer.

Tanü alima kin ajak nübör putepa lungjema alitsü tayimtenba olaji NA-A LIANG ASER TANGAR-A LIDAKJANG ta nükjidong yur aremzüktepa tai tokteper alitsü merangteper saka tang telok kati tangar mezüngmeshia I am the state, I am the law ta talir tezülur ajak amokmerena apusoba ya alima nübör agi atitsü? ta bilemer iba ocet ajanga NA-A LIANG TANGAR-A LIDAKJANG (LIVE AND LET LIVE) ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lifeline Arogo nung züngsemtem teimla mesama: Charles Dorsey



California kübok Altadena nung merok mi agi Lifeline Fellowship Christian Center Tenla ki rongdokba tesem nung Kangki bo merongi aliba noksa nung angur.

Tsüklai/February 01, 2025: Tawa California kübok Altadena nung nung merok mi lendong nung Lifeline Fellowship Christian Center Tenla ki-a rongdoka liasü; Tenla ki ajak rongdokaka Kangkibo marong, ibaji ajanga Arogo züngsemtem tamanga jenjang tashi taiba akümba den külemi teimla mesama.

Taküim January 7 nü tenzükba merok mi lendong nung Lake Avenue nung aliba Tenla kiji densema kiojen meyirjang aika rongdoka liasü.

Tang iba Arogo nung züngsemtemji kilometer 3 pilar Pasadena jila nung aliba Shield of Faith Christian Center nung ang tekülem sentong agia arudar. Parnoki tanaben Tenla ki tasen asütsü tebilemba lir.

Merok mi lendong nung par Arogo Tenla ki ajak rongdokaka Kangkibo merongdokba ya parnoki amangba Tsüngrem temeim kuli lir, ta parnoki amanger.

Osangbener den jembidang iba Arogo nung pastor, Charles Dorsey-i, "Tang tashi Kangkiji nokdaka lir; onok teimla mesama," ta ashi.

Pastor-i, "Kangkibo

merongdokba ajanga kü nem tienla agütsür aser ni tashi tasen angu. Kangki tang tashi nokdaka aliba agi ni pelar, kechiyong Kangkiji ajanga dang asenoki tai tokteter. Kangki temeim aser Kangki ajanga mapa inyakba agi asenok alangzükogo. Iba ya ajanga Arogo taküm aliba temaitsü sayur aser timtem mapang nunga tashi angur," ta ashi.

"Lifeline Arogo Tenla ki mitsü kümogo. Ajisüaka Kibubai iba atemaji tepor tajung agütsütsü nangzük. Iba nungjagi onok nokdaksü. Iba nungjagi onok aintsü, aser iba atemaji ni pelar," ta pastor Charles-isa metetdaksü.

Lifeline Fellowship ya Arogo ka dang masü saka nisung tapu balala aser mapa meranga inyakterem longjemba Arogo ka lir, ta pai ashi.

"Iba tesem nungji kibong aika kiojen lir, aser item kiojenji pei chirnur, semchirtem aser kinüngertemi senmanga arur. Iba tesem ya nisung alitsü asoshi tepor kanga junger, kibong yangertsü atema tesem tajung ka aser Arogo alitsü atema tesem tajung ka," ta pai ashi.

"Mi lendong atalokba sülen nisung 40 shi Arogo indang

temporary kidangi arua Tsüngremi parnok taküm kümzükba atema tenüngsang agütsü. Iba Amongnü tekülem sentong nung omenji 'mitsü nung tepor ajung' liasü," ta pai metetdaksü.

Kanga teintet senso apuani-Margaret aser Simeon Alexander nabo iba Arogo nungji küm 15 dak tali adener.

Osangbener den jembidang Margaret-i, "Onoki ozü Arogo Tenla ki menunrar. Lifeline Arogo ya tanelar kibong ka lir," ta ashi.

La kinüngbu Alexander-i, "Tsüngremi ajakji tajung ka atema dang inyaker, ta kobi melii onoki metettsü," ta ashi.

Pastor-i ashiba agi, merok mi lendong nung Arogo nung züngsem 13 kibo rongdokogo aser nisung 19 jenshiogo, ta metetdaksü.

"Arogo Tenla ki tasen asütsü mesüra tekülem agia atatsü atema gari anena ayudak süki ka asütsüa akok," ta pai metetdaksü.

"Tanaben yangertsü atema onoki yongyar. Tenla ki tanaben asütsü, kiyongertem ki tasen asütsü aser taküm yangerba repringtsü yongyar," ta Dorsey-i ashi.

ANOGO ABEN TSÜNGREM DEN

TAKOKBAJI AKANGA NOKTAKER MEYONG LIR

"Nenok taremzükba ajanga nenoki nenok takümü ajangzükttetsü."

~ Luke 21:19

Iba lima nung Khrista den jajatsü ya temoatsü aser jangratemtsü ka, saka aji kanga tezüba mapa ka masü kechiyong Khrista den jajar anemer iba lima nung jenti adoktsü. Il Peter15:19 nung Peteri ashiba yamai angur "Khrista den jajar alimai sempatsü aser reshikangshitsü."

Asen State Nagaland nungsa masüyonga asen aliba linük India tesem balala nung asenoki osang balala ajanga aser karbo asen tenüki ngua Khrista dak amanger anema abosua reshikangshiba tenük kulitem lir.

Yimtsüngtem aser town balala aika nung Khrista asoshi mapa balala inyakdang meyiper tepangi merasatetba nüngsen-nüngmen aser timtem jenti ajurur. Item tensa tia balala ajurudang tamang akanga meytetet mesüra maremzüktteti inyakra aseni Tsüngrem sentong kodanga atalokdaksütsü makoktsü.

Saka Kibubar mapang nung kenü anogo item timtem tekangshi ajak süitemtsü aser Kotaker takok marokji asen meyong asütsü ta tamang agi aremzükba litetra takokji asen meyong asütsü.

Pak nung Khristantemi social media ozüng tasenba anema nokdaker



January 28, 2025 nü Pakistan nung journalist temi Prevention of Electronic Crimes (Amendment) Bill 2025 (PECA) ozüng anema longkak aйдang tangokba noksa nung angur.

February 01, 2025: January 29, 2025 nü Pakistan Tiri social media dak sendakba ozüng tasen ka agizüka sign süogo, ajisüaka Arogo lenirtem aser meimchir temeden atema inyakteremiba iba ozüngji ajanga online nung reshikangshiba osang prokterem mesüra sorkar anema ola adokertem nem temerenshi agütsütsü, ta bilemer.

Prevention of Electronic Crimes (Amendment) Bill 2025 (PECA) kübok Digital Rights Protection Authority (DRPA) ka tentettsü aser parnoki social media nung inyaksangshi aika

nokdangtsü. Social media nung lemsaba ocet, noksa mesüra videos agentsü mesüra bushisüngdangtsü atema parnok nem tashi agütsütsü.

Arogo lenirtem aser meimchir temeden atema inyakteremi, social media nung osang tai mesüra tesempa otem prokba nokdangtsüji tongtibang, ajisüaka iba ama ozüng ya tim mesüi nüburtem reshikangshitsüa akok, ta metetdaksü.

Church of Pakistan nung Bishop Azad Marshall-i, tesempa otem aser osang tai prokba nokdangtsü atema social media

temzüngtem yanglushitsüji nüngdak ta Khristantemi bilemer, ajisüaka tai maket nisungtem anema inyaksü asoshi iba ozüng ya tim masüba nung mamshitsüla, ta metetdaksü.

Osangbener den jembidang Marshall-i, "Tsüngrem mezüngmeshiba ozüng kübok tiyazü nung tai tongloktsüba ajanga ozü nüburtem (Khristantem) timtemdar, kechiyong tiyazü nung tai tongloktsürtem nokdangtsü atemabo ozüng mali. Tang iba ozüng tasenba ya-a tim masüba nung amshira ozü nüburtem (Khristantem) aika takoksa angutsü," ta ashi.

Tang tashi nungbo Pakistan nung Khristantem densema minorities reshikangshiba osang prokba nokdangtsü atema ozüng kecha mali, ajisüaka telung nungbo item ama osang nokdang, kechiyong ibaji ajanga linük tenüng menüktsür, ta pai ashi.

"2023 küm Jaranwala nung Khristantem anema apusoba ama osangtembo alima tesem ajaklen prokshi, kechiyong iba ama tatalokba osangbo menokdangteli liasü," ta pai ashi.

"Nüburtem tebilemba lemsateptsü aser reshikangshiba tatalokbatem lemsateptsü atema social media ya kanga tongtibang hadir ka kümogo. Ajisüaka tang ozüng tasenba ya tim masüba nung amshia nüburtem tebilemba lemsatepba tsütsü tenokdangba alitsüa akok ta onoki tebilemstü akar," ta Arogo lenirisa metetdaksü.

Arogo lenirtem aser meimchir temeden atema inyakteremi iba ozüng tasenba aika, "Sorkar anema ola adokba nokdangtsü aser minorities reshikangshiba osangtem nokdangtsü atema atema iba ozüng tim mesüi amshitsüa akok," ta metetdaksü.

Meimchir temeden atema inyakterem aser osangbenertemiba iba ozüng anema ola adoka liasü, ajisüaka Parliament House anaprongla nung iba ozüng agizükba sülen linük Tir, Asif Ali Zardari-i sign süa iba ya ozüng kümogo.

Christians' True Spirit telok nung Chairman, Asher Sarfraz-i, social media nung tiyazü osang kanga proker, anungji onokiba iba ozüng pusemer, ajisüaka iba ozüng ya tim mesüi amshia nüburtem takoksa

mengudaksütsüla, ta ashi.

Osangbener den jembidang Sarfraz-i, "Alima tesem ajaklen tiyazü osang prokba ya tongtibang tebilemstü ka kümogo, ajisüaka iba ozüng kübok tai maket nisungtem anema-a inyaksüa akok," ta metetdaksü.

Pakistan nunga Facebook, TikTok aser WhatsApp amshirtem aika lir, ajisüaka mazüngertem aika aliba agi osang tai melamela prokshir.

Electronic Crimes Prevention (Amendment) Act 2025 kübok online nung osang tai prokterem küm asem tashi tepuokdak ayutsüa akok mesüra sen million 2 tashi senchi achitsüa akok.

Human Rights Commission of Pakistan (HRCP)-ia ozüng tasenba atema tebilemstü akaba lemsatepogo.

January 23, 2025 nü HRCP sangdong ka ajanga, "Alenseta südaksüba lisü taliba tokyimogo. Digital temeden azüoktsü atema item ozüng yanglushi ama repringteter," ta metetdaksü.

Iba ozüng anema January 28 nü Lahore, Karachi, Islamabad, Peshawar aser Quetta densema yimti aika nung longkak aitogo.

AO OSHI ANGAZÜKDAK:

TANÜ ANGAZÜKTSÜBA OJANG



Techir

(n) tebu aser tetsü ka chir, jala jabaso (child)

* Techir tambusangi tsürabur senmang amanger.

Techira

(adj) kanga junga leptepeba, tokolok tajung (sharp)

*Arem alepertemi nok techira amshir.

OLONG PAITEP # 7053

Grid for OLONG PAITEP # 7053 with numbers 1-24 in a crossword pattern.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7052 TELANGZÜBA

TIPIEN :

- 1. Anitet, 4. Tola, 6. Apet,
7. Lungmi, 10. Telongjem,
15. Nuoshi, 16. Zion, 17. Ngüm,
18. Rakzük.

LANGTSÜNGLEN :

- 1. Asang, 2. Teti, 3. Tila,
4. Tanü, 5. Lemjem, 8. Sot,
9. Agi, 10. Tenüng, 11. Tanük,
12. Asem, 13. Aier, 14. Azük.

UCC anema CM Conrad-i nokdakba Meghalaya BJP-i pusemer



Conrad K Sangma

Shillong, Tsüklai/February 1 (Agencies): Bharatiya Janata Party (BJP) Meghalaya unit-i, Chief Minister Conrad K Sangma-i Uniform Civil Code (UCC) anema nokdakba pusemba metetdaksüogo aser ashiba agi, par party-i state nung aliba nüburttem tejangraba mezüing südaksütsü.

BJP chief otongdar Mariahom Kharkrang-i Hokolbarnü ashiba agi, stakeholder ajak den sensaksemba sülen UCC dak sendakba nung party kong

nokdaksü aji telemtetba agitsü. "Meghalaya BJP atemabo nüburttem tejangraba ataloktsütsüiji ajak dang tongtibangtiba lir. Onoki stakeholders tem den tongtepa parnok tebilemba bendentsü aser iba dak ajemdaker telemtetba ka agitsü," ta pai ashi.

Kharkrang-isa, Meghalaya nung aliba nüburttem tebilemba aser ola kanga tongtibangsa agitsü, ta metetdaksü.

Linük ajunga nung UCC benoktsü atema Centre nung BJP-i aniba NDA sorkar maneni bendanga agütsür lir, saka National People's Party (NPP)-i aniba Meghalaya Democratic Alliance (MDA) sorkari state nung UCC benoktsü atema kecha tebilemba mali ta jangja jangja metetdaksüogo.

Chief Minister Sangma-i ashiba agi, ken o dak sendakba nung state sorkar masetshi-i nokdaka lir. Paisa, Meghalaya nung kin balala aser parnok sobaliba akümtsübuttsü koda tongtibang iba indang lemsatepa liasü.

Manipur CM-i Union Budget 2025 pelashishia agizükogo

Imphal, Tsüklai/February 1 (Agencies): Manipur Chief Minister N. Biren Singh-i Union Budget 2025 aser talisa Union Finance Minister Nirmala Sitharaman-i UDAN (Ude Desh ka Aam Nagarik) scheme sangdongba kanga pelashishia agizükogo.

Iba inyakim nükjidongji airport tilatem yanglua tayimtsü ajanga tesendaktep tajungba kümdakja tayimtsü nung senzütsü ososhi dalangba kümdaksütsü asoshi lir.

Social media ajanga Singh-i, Manipur aser Northeast ajunga nung UDAN scheme ajanga tajangzük agütsüba indang

metetdaksü aser ashiba agi, iba yagi anüng ajanga tesendaktep nung temelenshi adoakdakja senzüsenpong tezübaba kümdaksüba den tourism, shishilemba jenjang ajungketogo.

Paisa, iba scheme ajanga NE renloka aoba nung teyari agüja nüburttem libaliro jenjang tajungba kümdaksüogo, ta ashi. Singh-i iba scheme ajanga middle class tem ajangzükba indang talisa jemi aser ashiba agi, linük kübok tesem balala nung airport talila yangluyonga aoba ajanga nüburttem jenjang dalang agi senzüsenpong takaraba sütettsü.

Budget 2025 speech nung

Finance Minister Nirmala Sitharaman-i, yanglurshir benokba UDAN scheme ka indang metetdaksü, koba airport tasen 120 bendenloka regional connectivity tajungba kümdaksütsü nükjidong nung benokogo.

Iba scheme atsülangshiba ajanga taruba küm ter tsüngda passenger capacity crore 4 ajungtsü imlar aser talisa tenem nung aliba tesemtem aser northeast nung tesendaktep ajungkettsüba dak rangloker iba scheme benokogo. Iba scheme nung ano helipad aser airport tilatem nem teyari agütsütsü densema lir.

Manipur: Ali acres 50 nung poppy tsünüa aliba raksatsü

ImphalTsüklai/February 1 (Agencies): Manipur kübok north aser northwest nung tenem nung aliba district ana nung taoba ghonda 24 tsüngda ali acre 50 shi nung ozüng alema poppy tsüner aliba raksatsüogo.

Itangitertem nungi osang tejangja angazükba sülen security forces temi Hokolbarnü meita aoba sentong ka ayongzüka liasü.

Police osang ajang ashiba agi, Noney district nung ozüng alema ali acre 4.49 nung poppy tsünüa aliba raksatsüba sülen temesepba mozü yanglua

shibelenertem akoksadaksüogo.

Noney District Police-i anir Noney aser Tamenglong nungi forest team kati Noney Police Station kübok Nurathel yimtsüng anasa tenemtem meita oa liasü.

Kasa anogo Manipur Police, Central Forces, Forest Department, aser Executive Magistrate ta longjemer team kati Saikul-PS, Kangpokpi District kübok Lhungjang yimtsüng anasa poppy tsünüa aliba raksatsütsü asoshi meita oa liasü.

Meita aoba mapang ali acre 45 shi nung ozüng alema poppy tsünüa aliba nguteta

raksatsüogo.

Meita aoba mapang ken o dak sendakba nung nisung ka danga mapu.

Ken o maneni bushisingdangtsü atema FIR balala benokogo.

Manipur Chief Minister N Biren Singh-i social media ajanga tenüngsang agütsüogo. "Temesepba mozü anema raraba mapang security forces aser ketdangsürtemi anibelem mesasai maneni meranga inyakba atema poarnok nem tenüngsang agütsür," ta CM-i zülutsü.

GOVERNMENT OF NAGALAND DRUGS CONTROL ADMINISTRATION DEPARTMENT OF HEALTH AND FAMILY WELFARE NAGALAND: KOHIMA. PUBLIC NOTICE. Pursuant upon non-compliance of several notices issued and despite giving sufficient time for the employment of Registered Pharmacist in the Licensed pharmacies as required under Rule-65 of the Drugs and Cosmetic Rules 1945, the Drugs Control Administration, Department of Health and Family Welfare has canceled 24 (twenty four) Drugs License of Retail pharmacies at Dimapur and Chumoukidima districts as given hereunder.

Hamas puri Israel nunger asem chiokogo

Khan Younis, Tsüklai/February 1 (Agencies): Ceasefire atema nangzüktepba kübok tepuokertem melentepstü atema lateter aliba ama Hamas puri Honibarnü mapang balala ana nung parnoki pua aliba Israel nunger asem chiokogo.

French-Israeli nunger Ofer Kalderon aser Israel nunger Yarden Bibas na southern Gaza Strip kübok Khan Younis yimti nung Red Cross nem bendanga agütsüba Al Jazeera TV-i Honibarnü sayuogo.

American-Israeli nunger Keith Siegel-a ghonda ka lir Gaza City nung Red Cross ketdangsurtem nem bendanga agütsüogo.

Khan Younis aser Gaza City naprongla nung Kalderon, Bibas aser Siegel nunger ketdangsurtem nem bendanga agütsüba mapang Hamas züngsem noklang aikti adenshia aliba lokti achaayanga liasü.

Kalderon aser Bigas na Israel tongogo, kong tena mezüing temang anepaluba sülenang kinungertem den ajurtepsü.

Al Jazeera osangbener Tareq Abu Azzoum-i Khan Younis nungi ashiba agi, taoba mapang dang nungi tang sentong tajungba yanglur tepuokertem bendanga agütsüogo.

"Taoba mapang ama masü nüburtem menongtepidang tajinütsüka chiokogo. Yimya agi iba amala inyakyim ya tensa mejungi aliba mapang dang inyaker," ta pai ashi.

Qatar University nung

professor aser Middle East politics nung mongin Luciano Zaccara-i ashiba agi, tang pua alirtem chiokba ajanga Israel-i ita aika makaka Hamas puri maneni Gaza nung tensa azioktetba sayur.

"Israel-i Hamas pur samatsüogo ta ashir, saka tatalokba koba asenoki nguogo iba ajanga Hamas pur maneni inyaksangshiba sayur," ta pai Al Jazeera dang ashi.

"Tepuokertem memonui dang melentepdar aser ceasefire tanabuba shilem ya sentong yanglur aliba ama dang aotsü imla atar," ta paisa shisem.

January 19 nü yangluba ceasefire nung shilem ka ama Israel nungeri Palestine nunger tepuoker 183 chioktsü imlar.

Tenangzüktepba tanabuba shilem nung Hamas puri pua aliba Israel nung 60 dak tema, Israel nung tepuokdak yua aliba Palestine nunger aser Gaza nungi Israel nunger sepaitem ainshitsü atema sensaksem Mongolbarnü nungi tenzüksü

Ceasefire benoker mezüingbuba hopta trok nangzüktepba ama inyaksangshia arudar. Telok anapronglai tenangzüktepba nung aibelenba atema kati ka dak tai tongloktsütepa aruda, saka tang tashi nung mepetmesü tulubo adoka mali. United States-i teyari agüja Egypt aser Qatar na teyongtsü ia iba ceasefire ya benoka liasü.

Honibarnüsa Gaza aser Egypt na tsüingda Rafah border crossing

lapokshitsü imlar. Shiranga aliba aser kanga mejungi yirur aliba Palestine nungertem temang anepalutsü atema aotsü asoshi iba crossing ya lapoktsütsü.

Al Jazeera osangbener Hani Mahmoud-i Gaza City nungi ashiba agi, arrtsü ya Honibarnü menor lapoktsütsü imlar aser iba ajanga mezüing shiranga aliba Palestine nung 60 Gaza nungi anintsü atema temelaba agütsütsü. Palestine nung ajak ya kinunger asem nem miner odaktsütsü.

Iba ya kanga tongtibang lir, kechiyong iba ajanga Gaza nung Palestine nungertem nem humanitarian teyari agütsütsü atema temelaba agütsütsü, ta Mahmoud-i ashi.

Jerusalem anüolen alir Israeli columnist Gershon Baskin-i Al Jazeera den sensaksemba mapang ashiba agi, Rafah crossing lapoktsüba indang ya Israel nungbo kangabo sensak masemer.

Hamas puri October 7 nü Israel maka nisung 1,139 tepsetba den Israel nung 250 dak tema pur oa liasü.

Iba tatalokba sülen Israel-i meyipar Gaza Strip amak tenzük aser Palestine nung 47,000 dak tema tepsetogo, ta Palestinian health authorities-i metetdaksü.

Kasa mapang nung Ceasefire benokba sülen Palestine nung meyrejang aika pei talidak ki bushia meypa odar, ajisüaka parnok talidak kitem timbaka ajaras lir.

MENUNGRA BILEMTETER



Asür Miss. Tiasenla (Akhoya)
13.02.1976 - 01.02.2024

Temeim Oya, nai onok toktsür orr tanü küm ka ajunger. Saka nü temeim temoatsü aser shisatsü tajung anogoshia menungra bilemteter. Oya na onok mulungjang nung teti lir aser na Tsüngrem den anisüngzük dak lir ta amanga onok mulungjang süngzük.

- Temeim kinungertem.

OFFICE OF THE
CHANGTONGYA SENSO TELUNGJEM DIMAPUR
DIMAPUR : NAGALAND
Motto : *Telungjem Aser Teyaritep*

PELABA METETDAKTSÜR

Changtonya Senso Telungjem Dimapur (CSTD), Dimapur Changtongyatsür Telungjem (DCT) aser Changtongya Kaketshir Telungjem Dimapur (CKTD)-i Imkongmeren Jamir'er jabaso senso tajung Mr Imokaba Jamir IRS, pai langa aliba ama Commissioner of Income Tax nungi Principal Commissioner of Income Tax, Government of India-i promote asüba atema kanga pelaba lemsateper. Iba takok ya pai aremzüka bendanga agüja inyakba aser iba luyim nung teyari tulu agütsüba kuli lir. Pai takok tulu anguba atema onok kanga nema adanger aser pai kanga meranga inyakba atema tenüngsang agütsür. Mapa tasen agizüka inyakba mapang maongka tajungba aser takok tajungba nguyonga aotsü imlaja atar. Pa tarutsü nung maneni takok nung aotsü imla atar.

Sd/-
President
CSTD

Sd/-
President
DCT

Sd/-
President
CKTD

ALI TAYOKTSÜ LIR

1. Old Showuba nung, 12397 Sqft. Four lane, fly over anasa.
2. Rs. 50 per Sqft. Aginüba tasazük angütsü.
3. (5 Pura) 1 Pura - 3,200,000/-
Contact : 9863826159.

Iran-i parnok indang nuclear sites mamaktsü metetdaksü

Tehran, Tsüklai/February 1 (Agencies): Iranian Foreign Minister Abbas Araghchi-i Al Jazeera dang ashiba agi, Israel indang nuclear facilities makra iba tesem nung rara adoktsü.

Qatar semdang dang Al Jazeera Arabic den sensaksemba mapang Araghchi-i, Iran indang nuclear facilities makra aji puti otsü nung US asoshi aibelen tulutiba asütsü ta tekümdaktsü metetdaksü.

Pai ashiba agi, parnok makra Iran-i idakjsa telangzüba tesashi agütsütsü aser iba ajanga parnok meket aliba tesemtem nung rara adoktsü.

US tir Donald Trump-i Israel Ato Kilonser Benjamin Netanyahu nem Iran indang nuclear sites tem amaktsü atema tashi agütsüba akok ta shisabulua bilemer. Trump-i term anabuba tir mapa abenba mapang ano Iran nem tenokdangba tesashiba agütsütsü akok.

Araghchi-i ashiba agi, pai Qatar Ato Kilonser aser Foreign Minister Sheikh Mohammed bin Abdulrahman bin Jassim Al Thani den Doha nung ajurutepa ken o tongtibangtem

sensaksemogo. "Gaza nung ceasefire benoktsü atema Qatar-i tongtibang shilem agiba atema onoki tenüngsang agütsür. Ken o tem ajak bentettsü imlar," ta Araghchi-i Hokolbarnü interview agiba mapang ashi.

Paisa, Qatar semdangba mapang Hamas nunger ketdangsurtem den ajurutepogo aser ashiba agi, Gaza nung Palestine nungertemi takok nguogo.

"Alima ajaki ngua nisung aika tepsetba den teraksatsüba tulu adokaka Palestine nungertemi masetshi-i nokdaka parnok tamendakdak aser tangatetba maneni ajungketogo. Iba ya takok ka ta bilemer," ta pai ashi.

Syria nung tatalokba indang jembiba mapang Araghchi-i, Syria nunger ajaki shilem agitettsüsa sorkar kümtepsü asoshi Iran-i pusemer, ta ashi. Taoba tir Bashar al-Assad shiba taoba ita atsüngtoka liasü pa ya Iran den kanga junga sendaktepa liasü.

2011 küm Syria nung rara tenzükba sülen Iran-i al-Assad pusema aruogo aser pa nem sepaitem, prangbong injang aser tanga military teyari agüja liasü.

DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

ADVERTISEMENT
Dated Kohima, the 1st February, 2025

NO.DESE-10/09/2024 : Interested candidates are hereby invited to apply for **Free Residential Training under Pradhan Mantri Kaushal Vikas Yojana (PMKVY 4.0)**- Special Project funded by Ministry of Skill Development & Entrepreneurship(MSDE), Govt. of India. Details of Job Roles and Training Centers are mentioned below:

Sl. No.	Job Role	Training Centers	Contact
1	AI-Business Intelligence Analyst	i) Pinacle Skills	Dr. Yan Murry, Ph.7005581050
		ii) AISECT	Smit. H. Lovino Chishi, Ph.7005995258
2	Plumber-General	i) Skill Alli	Shri.Richard Zeliang, Ph.9862883796
3	Drone Service Technician	i) Tusti Foundation	Shri. Prashanjit Chakraborty, Ph.9864983189
4	Processed Food Entrepreneurship	i) YouthNet	Shri. Helkhsiemi Singson, Ph. 7005591810
5	Counter Sales Executive-Tourism & Hospitality	i) Bhawani Marketing Pvt. Ltd.	Shri. Amit Sinha, Ph. 9435292999
		ii) Institute of Tourism & Hotel Management(ITHM)	Shri. Debasish Pramanik, Ph. 8777097318
		iii) Tusti Foundation	Shri. Prashanjit Chakraborty, Ph.9864983189
6	Graphic designer	i) Nagaland Institute of IT & Multimedia (Nagaland IITM)	Shri. Purtooshi, Ph. 8974101482
		ii) Techno Park	Shri. Talimeren, Ph. 8132031900
7	Seller Activation Executive -Merchant Relationship Executive	i) BCS Consulting Pvt. Ltd.	Shri. Ravi Shankar, Ph. 8252068148
		ii) Bhawani Marketing Pvt. Ltd.	Shri. Amit Sinha, Ph. 9435292999
8	Bridal, Fashion & Portfolio Make Up	i) Make Over Academy	Shri. Rajiv Basumatri, Ph. 6909813566
		ii) Institute of Skill Development- Skillability	Ms. Ross Murry, Ph. 9612435277
9	Forest Nursery Raiser	i) Evergreen Welfare Society	Shri. Chopiba Z Thongro, Ph. 8837462804
		ii) Konyak Tribal Welfare Society	Ms. Mary Honang, Ph. 8974189412
10	Construction Electrician	i) TK Skills	Shri. Limakum Jamir, Ph. 9436266025
		ii) Skill Alli	Shri.Richard Zeliang, Ph.9862883796
11	Traditional Hand Embroiderer	i)Konyak Tribal Welfare Society	Ms. Mary Honang, Ph. 8974189412
		ii) MAKAR Skill Development & Services	Ms. Bendangmenla, Ph. 9077885812
		iii) Nagaland Women Vocational Training Institute	Ms. Temjenlemla Jamir, Ph. 9615678527
12	Mushroom Grower(Entrepreneur)	i)TK Skills	Shri. Limakum Jamir, Ph. 9436266025
		ii) Pragtisheel Vision Foundation	Shri. Myingthungo Tungoe, Ph. 8787628110
		iii) Konyak Tribal Welfare Society	Ms. Mary Honang, Ph. 8974189412
13	Mason Tiling	i)Evergreen Welfare Society	Shri. Chopiba Z Thongro, Ph. 8837462804

Note: Candidates may contact the numbers indicated above for registration as per preferred choice of Job Role.

Sd/-
SAVIO VISA, Director

Arjun & Ojasvi nati 10m air rifle mixed team Gold angu



Ojasvi Thakur & Arjun Babuta

Tsüklai/February 1, 2025 (Agencies): Dehradun nung 38buba National Games tenzükter Honibarnü pezünübuba Punjab nungi Arjun Babuta aser Ojasvi Thakur nati 10m air rifle mixed team asaya nung gold medal nguogo.

Trishool Shooting Range nung gold medal atema asayaba mapang Arjun aser Ojasvi nati Maharashtra nungi Arya Borse aser Rudranksh Patil na 16-12 agi koka liasü.

Tarep ana kanga toktepba asayaba sülen Punjab nung tarep yagi point 21.4 ngua Maharashtra (21.0) nungi tarep

ya koka liasü.

Bronze medal atema asaya nung West Bengal nungi Abhinav Shaw aser Ismita Bhowal nati 17-11 agi Gujarat team kokogo. West Bengal-i ajak senteper point 21.1 angu aser Gujarat team-i 20.4 ngua liasü.

"State atema gold medal ngutsüba asoshi kanga pelar aser iba takok ya künapronglai junga asayaba ajanga lir," ta arishi küm 16 tain Ojasvi-i ashi.

"Shooting range nung gold atema nukjidong yur asayaba mapang künapronglai kija asaya dak rangloker asaya-a takokba

tashi point timba angutsü merangogo," ta arishi küm 26 tain Babuta-i ashi, shibai 2022 Changwon World Cup nung 10m air rifle kija akokba den team asaya nung gold medal angu. Babuta-isa 2023 Asian Championships team asaya nung gold medal ngua liasü.

Qualification round nung India kübok tesem balala nungi team 25 asaya aser tajungtiba team pezü final-i ia liasü. Qualification nung Punjab-i point 631.7 ngua parnok temaba jenjang nung liasü aser Maharashtra (630.7), West Bengal (630.6) aser Gujarat (629.4) nung tanabuba, tasembuba aser pezübuba nung liasü.

Kasa mapang nung Tetsür 25m pistol asaya qualification round nung Punjab nungi Simranpreet Kaur Brar (579) temaba jenjang nung liasü.

Delhi nungi Pushpanjali Rana (578), Karnataka nungi T S Divya (577), Maharashtra nungi Rahi Jeevan Sarnobat, Haryana nungi Annu Raj, Maharashtra nungi Riya Shirish Thatte (576), Punjab nungi Neeraj Kaur (574) aser Haryana nungi Anjali Choudhary (573) nung final-i iogo.

Iba asaya nung linük kübok tesem balala nungi asayar 30-i shilem agia liasü.

Man Utd-i Arsenal nungi asayar Heaven alizükogo

Tsüklai/February 1, 2025 (Agencies): Manchester United-i England nung Under-19 defender Ayden Heaven Arsenal nungi alizükogo. Pa den küm pezü ser tedang atema tenangzüktepba yangluogo.


United-i ashiba agi arishi küm 18 tain asayar ya first-team squad den inyaksangshi tenzüksü. Pa sen kwi agi alizük iba indang osang tejanga magütsü.

Heaven ya arishi küm 13 asüba mapang 2019 küm Arsenal nung aden aser pa October ita Preston nung EFL Cup akokba mapang substitute ama senior team nungi mezüngbuba asaya liasü.

"Ni Manchester United nung adenba atema kanga pelar. Kü pungmang asangsang kümdaktsüba nung shirnokisa kü nem teyari agütsüogo nenok ajak dang kanga pelar," ta pai ashi.

"Ni asaya nung ajangzükünüba aika lir. Ni maneni renloka oa ni akokba tashi asayar tajungtiba ka akümtsü atema bendanga agüja inyaksü," ta pai ashi.

Manchester United technical director Jason Wilcox-i ashiba agi, "Ayden Manchester United nung adenba atema pelar. Pa sempet tajung aketba defender



Ayden Heaven

ka lir, shiba maneni renloka aotsü asoshi first-team squad nung adentsü atema renema lir.

"Club-i lanur asayarterm nongita aruba kuli tajung lir aser Ayden temaba jenjang atongtsü atema iba ya tetemsü tesem ka lir," ta pai ashi.

October ita arishi küm 17 tain striker Chido Obi-Martin Arsenal nungi aru adenba sülen Heaven ya United nung adenba asayar tanobusang asütsü.

Kasa mapang nung Lecce left-back Patrick Dorgu, Honibarnü medical tendangtsü atema Manchester-i ogo.

Denmark nung international asayar ya Hokolbarnü Serie A nung Lecce puri Parma akokba asaya nung substitute nung dang mena liasü.

Source ajanga ashiba agi, Heaven ya add-ons densema pound million 30 dak tekübok agi alizükter alitsü.

Duran Saudi Pro League club Al-Nassr nung denogo

Tsüklai/February 1, 2025 (Agencies): Striker Jhon Duran Aston Villa nungi Saudi Pro League club Al-Nassr nung denogo. Pa den tenangzüktepba yangluba ya pound million 71 alang asütsü.

Arishi küm 21 tain Colombia nung asayar ya Riyadh nung Cristiano Ronaldo aser Sadio Mane nung den denogo.

"Jhon Duran Al Nassr nung adenba Aston Villa-i jangjatsür," ta club-i ashi.

"Aston Villa dak sendaka alir ajaki Jhon pa indang professional career nung jenjang tasen ka agiba mapang takok ngua aotsü imlaja atar," ta kasa sangdong ajanga metetdaksü.

Bodhbarnü Villa puri Champions League nung Celtic goal 4-2 agi akokba asaya nung Duran ya substitute asayar ka liasü, saka pa masayadaksü. Iba asaya akokba sülen Villa pur iba asayamung round of 16-i iogo.

Duran ya 2023 küm January ita Chicago Fire nungi pound million 18 yong Villa nung arua aden, saka pa taoba küm lemluwa nungi club toktsür aotsü atemshia aruogo.

Pai tang asaya aliba season nung Villa atema asaya 29



Jhon Duran

nung goal 12 idaktsü aser Villa nungi ajak senteper 78 ben asayba mapang goal 20 idaktsür lir.

Duran-i club toktsüba sülen club nung striker Ollie Watkins kija kümogo, shiba iba Hopta Arsenal puri alizükünüba ashishiogo.

Ajisüaka Watkins yoktsü atema Villa pur kecha tebilemba mali.

Villa coach Unai Emery-i Bodhbarnü ashiba agi, "Ni meyokner. Tanga club-i maongka agütsüba ya osang tajung lir. Squad nung aliba

asayarterm ajanga onoki onok indang asaya nukjdongtem yuner.

"Asayar aser club atema jungra asayar ajak shishilembadak toktsütettsü. Iba tenangzüktepba yanglutsü atema onoki aika akhangtsü. Watkins ya onok indang striker lir," ta pai ashi.

Villa-i, January transfer window nung Borussia Dortmund nungi forward Donyell Malen alizükogo, aser pa ya Moussa Diaby melener ama züngshir, shiba Al-Ittihad nung denogo.

Australia-i innings ka ser run 242 agi Sri Lanka kokogo

Tsüklai/February 1, 2025 (Agencies): Galle nung mezüngbuba Test asayaba mapang Australia-i pezünübuba wicket 15 agiba sülen Sri Lanka innings ka ser run 242 agi kokogo, koba SL asoshi Test asaya nung tamakok tulutiba liasü.

Left-arm spinner Matt Kuhnemann-i, küm ana tsüngda tang mezüngbuba Test asayaba mapang wicket teku agia liasü.

Kuhnemann aser Nathan Lyon, shibai iba asaya nung wicket tenet agi, tenati SL team mezüngbuba innings nung tatembangbuba wicket pongu ya run teku dang yangludaktsür out sütsü, aser iba sülen captain Steve Smith-i follow-on benoka liasü.

Asaya akoktsü run 489 nüngdaka asayaba mapang Sri Lanka nung asayartermi run 247 dang yanglur ajak out süatok. Parnok rongnungi tailender Jeffrey Vandersay-i run 53 yanglua tatsüka nokdanga liasü.

Run 136 yangur asayar 5 out

sür asaya tenzükba sülen Kuhnemann aser Lyon nati Sri Lanka nung batter tem nem timtem tulu agütsü, aser tatembangbuba wicket pongu ya over pezü nung dang out süa liasü. Dinesh Chandimal run 72 yanglur lia Lyon-i out sütsü aser kasa mapang nung Kuhnemann-i run 63 agütsür wicket 5 agia liasü.

Tanabuba innings nung Sri Lanka nung opener anaprongla kanga kara out süatok. Mitchell Starc-i Oshada Fernando aser off-spinner Todd Murphy-i Dimuth Karunaratne out süja liasü.

Chandimal, Angelo Mathews, Kamindu Mendis, captain Dhananjaya de Silva aser Kusal Mendis nung ajaki run 30 jungabo yanglu saka run aika meyangluteti liasü.

Asaya nung keeper Alex Carey-ia kanga jung asaya-a stumping asem tashi süja liasü.

Australia aser Sri Lanka na tanabuba Test Galle International Stadium nung February 6 nü tenzüksü.

BILEMDANGANG

"Tenung khen menükatokra meyipa magiteter."